

տեղ ամայի չմնայ: Եթէ մէկը որեւէ պատճառով անկարող է ցանք անելու, կերակրապետը պիտի յայտնի նահանգի պետին, որ սա հարկաւոր օժանդակութիւնը ցոյց տայ նրան: Նա ժամանակին պիտի հաւաքի եւ ամուր ու ապահով վայրերում ամբարի պետութեան համար սահմանուած բաժինը տարեկան բերքից — ցորեն, գարի, գինի, ձէթ եւն., հինը հանելով եւ յանձնելով կուտակալին, որ վաճառի յօգուտ պետութեան: Նա պէտք է հետեւի, որ իւրաքանչիւր բնակիչ իր տարեկան կերակուրն ունենայ եւ բացի դրանից պետական շտեմարաններում նա միշտ պիտի ունենայ երկու տարուան պաշար նահանգի ամբողջ ազգաբնակչութեան համար, հաշուելով մէկ անձին երեք բեռ ցորեն: Նոյն ձեւով նա պիտի վարուի նաեւ անասունների կերի համար, որպէսզի ազէտի դէպքում, երեք տարով ապահովուած լինին եւ նահանգի բնակչութիւնը, եւ նրա անասունները: Այդ բոլոր հաշիւների համար նա պիտի օգտուի նահանգի վիճակադրութիւնից, որ ամէն դեկտեմբերին կազմում է նահանգապետը եւ ներկայացնում ազգային ժողովին (հ, ւժա):

7. Գանձապետութիւն. զանձապետը զանձում է պետութեան եկամուտներն ու ապառիկները եւ պահում զանձը ամուր քաղաքում: Նա հաշուետու է ազգ. ժողովի առջեւ, գործում է նրա ցուցմունքներով եւ ամէն ամիս հաշիւ է ներկայացնում նրան (հա):

8. Երկրաչափութիւն. պաշտօնն է՝ կազմել Հայաստանի մանրամասն քարտէսը կամ յատակագիծը եւ դժեւ նահանգների ու գաւառների սահմանները: Երկրաչափն է տալիս ազգ. ժողովով կամ օրէնքով սահմանուած հողը քաղաքներին ու վանքերին եւ հետեւում է, որ շէնքերը կառուցուին ըստ ընդունուած կարգի: Բոլոր նահանգական քաղաքների մօտ նա պիտի ունենայ մի լայնարձակ դաշտ, քաղցր ջրի վրայ, ուր կարողանայ բանակել 60,000 զօրք: Ոչ ոք իրաւունք չունի այդ դաշտում շէնքեր շինելու կամ այգի տնկելու: Հարկաւոր դէպքում՝ երկրաչափը քաց է անում ճանապարհներ եւ անց կացնում ջրեր, տնկում է անտառներ եւ ամէն կերպ զարկ է տալիս երկրի տնտեսութեան զարգացմանը (հք):

9. Պետ տկարաց եւ աղքատաց. մի տեսակ խնամատարութեան նախարարութիւն է: Տրկարաց եւ աղքատաց պետը իւրաքանչիւր նահանգական քաղաքի մօտ պիտի ունենայ ընդարձակ մի տուն՝ տկարների, վիրաւորների, աղքատների եւ բոլոր խնամքի կարօտ անկարողների համար: Նրանց պահպանութիւնը եւ բժշկութիւնը պետութեան հաշուին են: Տկարաց եւ աղքատաց պետը պէտք է աշխատի զարգացնել երկրում արդէն ծանօթ բժշկական բոյանքի, ծաղիկների ու արմատների մշակութիւնը, նաեւ յայտնաբերել նորերն ու անծանօթները, որոնք արտահանուելով օտար երկրներ, կարող են մեծամեծ օգուտներ բերել թէ՛ մեր երկրին եւ թէ՛ միւս ազգերին: Յատկապէս բորոտութեամբ բռնուած հիւանդները պէտք է առանձնացուեն ու բժշկուեն անմարդաբնակ լեռներում (հգ):

Այս բոլորից դուք տեսնում էք, որ Շահամիրեանը փորձել է ըմբռնել անկախ Հայաստանի բովանդակ կեանքը եւ նրա բոլոր ճիւղերի կարգադրութիւնը օրէնքով սահմանել: Սակայն չմոռանանք նաեւ անմիջապէս աւելացնել, որ այդ ճիւղերից մի քանիսը անտեսուած են նրա կողմից, իսկ բերուածների էլ կարգադրութիւնը հարկաւոր ճշդութեամբ եւ լրութեամբ չի արուած:

ՄԻ ՔԱՆԻ ԴԻՏՈՂՈՒԹՅՆԻՆԵՐ

ՊԱՇՏՈՆՆԵՐԻ ՎԵՐԱՍԵՐՄԱՄԲ

Հայաստանի պետական կազմակերպութեան ընդհանուր պատկերը տալուց յետոյ՝ անհրաժեշտ ենք համարում յետագայ դիտողութիւնները աւելացնել, որոնք կարեւոր են նոյն այդ պատկերի ամբողջացման տեսակէտից:—

1. Բոլոր կարեւոր պետական պաշտօնները — նոյնիսկ զինուորական — բղխում են անմիջականօրէն Ազգ. ժողովից եւ ընտրութեամբ են: Ոչ մի նշանակովի մեծ պաշտօնեայ չկայ Հայաստանում:

Դրա հետ միասին՝ բոլոր խոշոր պաշտօնները երեք տարով են եւ նորոգւում են Ազգ. ժողովի հետ միասին: Ուրիշ խօսքով՝ Ազգ. ժողովի իւրաքանչիւր նոր կազմի հետ միասին նորոգւում է նաեւ երկրի բովանդակ պաշ-